

Namminersornerullutik Oqartussat umiarsualiveqarfutaannik sanaartorneq, aserfallatsaaliineq, ingerlatsineq il.il. pillugit Inatsisartut peqqussutaat

Innaallagialaq, imeq kiallu, qatserisartoqarneq, umiarsualiviit, aqqusernit, nalunaarasuaatikkut atassuteqarneq il.il. pillugit Kalaallit Nunaannut inatsimmi nr. 943-mi 23. december 1986-meersumi § 3 tunngavigalugu aalajangersarneqarput:

Atuuffii

§ 1. Inatsisartut peqqussutaat Namminersornerullutik Oqartussat umiarsualiveqarfutaasa sanaartorneqarnerannut, aserfallatsaaliineqarnerannut ingerlanneqarnerannullu kiisalu umiarsualivinnut qitiusumik oqartussaanerup umiarsualivinnilu suliasatigut oqartussaanerup ingerlanneqarnerannut atuuppoq.

Imm. 2. Inatsisartut peqqussutaat manna umiatsilivinnut sunngiffimmi atorineqartunut imaluunniit Kangilinnguani Pituffimmilu sakkutuut umiarsualiviinut atuutinngilaq. Aammattaaq Inatsisartut peqqussutaat manna umiarsualivinnut il.il. tankeqarfinnut toqqaannartumik atasunut atuutinngilaq, taakku Pilersuisoq A/S-imit pigineqarmata.

Siunertaa

§ 2. Namminersornerullutik Oqartussat umiarsualiveqarfutaasigut usinik tigooraaneq usilersuinerlu, aalisartunik sullissineq kiisalu imaatigut ilaasunik angallassisunik sullissineq pingaarnertut siunertarineqarput.

Imm. 2. Inatsisartut peqqussutaatigut siunertarineqarpoq qulakkiissallugu Namminersornerullutik Oqartussat umiarsualiveqarfutaat pilersaarusiorneqassasut, annertusarneqarlutik, aserfallatsaaliineqarlutik allaffissornikkullu aqunneqarlutik, umiarsualiveqarnikkut siunertat pingaarnerusut sapinngisamik pitsaanerpaamik salliutinneqartussanngorlugit.

Namminersornerullutik Oqartussat umiarsualiveqarfutaannik sanaartorneq, aserfallatsaaliineq ingerlatsinerlu

§ 3. Naalakkersuisut Namminersornerullutik Oqartussat umiarsualiveqarfutaanni sanaartukkat, aserfallatsaaliinerup ingerlatsinerullu allaffissornikkut aqunneqarnerat pillugu aalajangersaassapput, matumani umiarsualiviit nunaminertaanik atuinermut akiliuteqartitsisinnaaneq ilan-ngullugu eqqarsaatigalugu.

§ 4. Naalakkersuisut umiarsualiveqarfimmi oqartussaannerup ingerlanneqarnissaanut aalajangersaassapput, kikkut najukkami suliassatigut umiarsualiveqarfimmi oqartussaaneq ingerlatissaneraat ilanngullugu.

Pineqaatissiissutit, atuutilerfia il.il.

§ 5. Malittarisassani inatsisartut peqqussutaat naapertorlugu atuutilersinneqartuni pillammik akiliisitsinikkut pineqaatissiissutissanik aalajangersaasoqarsinnaavoq.

Imm. 2. Kalaallit Nunaanni umiarsualiveqarnermi malittarisassat 5. maj 1951-imeersut kingusinersukkut allannguuteqartinneqartarsimasut kiisalu malittarisassat taakku tunngavigalugit maleruaqqusaliat atorunnaarsinneqarnissamik tungaanut imaluunniit Inatsisartut peqqussutaat manna tunngavigalugu maleruaqqusalianit taarserneqarnissamik tungaanut atuutissapput.

§ 6. Inatsisartut peqqussutaat manna 1. december 1999 aallarnerfigalugu atuutilerpoq.

Namminersornerullutik Oqartussat, 29. oktober 1999

Jonathan Motzfeldt

/

Steffen Ulrich-Lynge

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

